

दिनांक 25.09.2025
 समय: 18.45 बजे
 आकाशवाणी जयपुर-अजमेर
 प्रादेशिक समाचार

- प्रधानमंत्री नरेन्द्र मोदी बांसवाड़ा ऊँ 1 लाख 22 हजार करोड़ रुपया ऊँ बत्ता खर्च वाळी विकास री केई परियोजनावां रा काम री नीव रखी अर पूरा व्ह्या काम जनता ने सूंप्या-कह्यो-राजस्थान री धरती ऊँ ऊर्जा हलका मांय भारत री काबिलियत रो नुवो पाठ सरू ।
- प्रधानमंत्री जीएसटी रा बारा मांय भ्रम फैलावण रा मामला मांय विपक्ष री आलोचना करता थकां कह्यो-आं सुधारां ऊँ हर तबका ने साता मिलेला ।
- राज्य ऊँ दिसावर मांय बिक्री मांय साल 2024-25 रे दौरान 16 फीसदी री रिकॉर्ड बधोतरी ।
- पंडित दीनदयाल उपाध्याय री जयंती रे मौके जिलां मांय न्यारा-न्यारा आयोजन ।

प्रधानमंत्री नरेन्द्र मोदी आज बांसवाड़ा मांय विकास री 1 लाख 22 हजार करोड़ रुपया ऊँ बत्ता खर्च वाळी न्यारी-न्यारी परियोजनावां रा काम री नीव रखी अर पूरा व्ह्या काम जनता ने सूंप्या । श्री मोदी बांसवाड़ा कने नापला मांय माही बांसवाड़ा राजस्थान परमाणु ऊर्जा परियोजना रा काम री नीव रखी । 42 हजार करोड़ रुपया रा खर्च वाळी ई परियोजना रा तैत परमाणु ऊर्जा पैदा करण री 700 मेगावाट बूता री चार इकाइयां लगायी जावेला । ई सागे ई प्रधानमंत्री सूरज री रोशनी ऊँ बिजली बणावण, पीवण रा पाणी, ईलाज, बुनियादी ढांचा विकास अर हाई-वे बणावण समेत विकास री केई परियोजनावां रा काम री नीव रखी अर पूरा व्ह्या काम जनता ने सूंप्या । श्री मोदी प्रदेश मांय चालण वाळी तीन नुवी रेल गाड़ियां ने ई वर्चुअल तरीका ऊँ हरी झंडी बता र रवाना कीनी ।

ई पाछे जनसभा मांय श्री मोदी कह्यो के राजस्थान री धरती ऊँ ऊर्जा हलका मांय देश री काबिलियत रो नुवो पाठ लिख्यो जा रह्यो है । वे कह्यो के आज न्यारा-न्यारा राज्यां मांय बिजली बणावण री 90 हजार करोड़ रुपया ऊँ बत्ता खर्च वाळी परियोजनावां सरू व्हे रही है, जो बतावे है के देश बिजली री रफ्तार ऊँ आगे बढ़ रह्यो है अर ई रफ्तार मांय देश रा सगळा हिस्सा शामिल है ।

प्रधानमंत्री कह्यो के राजस्थान मांय भाजपा री मौजूदा सरकार प्रदेश रा विकास सारू ईमानदारी ऊँ काम कर रही है। श्री मोदी राज्य मांय लारली सरकार री बगत पेपरलीक, भ्रष्टाचार अर कानून—व्यवस्था रा हालात रो जिक्र करता थकां कह्यो के राज्य री मौजूदा सरकार प्रदेश री जनता रा भला सारू लगातार काम कर रही है। श्री मोदी कांग्रेस माथे आदिवासियां रा मुद्दां माथे ध्यान नी देवण रो आरोप माण्डता थकां कह्यो के भारतीय जनता पार्टी हमेशा आदिवासियां रा भला सारू काम कीनो है। प्रधानमंत्री जनजातियां रा भला सारू चलाई जा रही न्यारी—न्यारी योजनावां रो जिक्र करता थकां कह्यो के वे आदिवासी समाज रा स्वाभिमान अर संस्कृति री हिफाजत करणो तैय कीनो है।

हाल ही मांय करी ज्या जीएसटी सुधारों री चर्चा करता थकां श्री मोदी कह्यो के आं सुधारों ऊँ रोजीना काम आवण वाळी घणखर चीजां सस्ती व्हे गयी है अर रसोई रो खर्च कम व्हे गयो है। श्री मोदी विपक्ष माथे जीएसटी रा बारा मांय भ्रम फैलावण रो आरोप माण्डता थकां कह्यो के जीएसटी मांय करी ज्या सुधारों ऊँ समाज रा हर तबका ने साता मिलेला अर हर परिवार रा खर्च मांय अच्छी—खासी कमी व्हेला। कार्यक्रम ने केंद्रीय मंत्री प्रल्हाद जोशी अर मुख्यमंत्री भजनलाल शर्मा ई संबोधित कीना। मुख्यमंत्री वां रा संबोधन मांय कह्यो के प्रधानमंत्री मोदी री अगुवाई मांय प्रदेश ने विकास री केई सौगातां मिली है। वे कह्यो के राज्य सौर अर नवीकरणीय ऊर्जा रा हलका मांय नुवा मुकाम हासिल कर रह्यो है।

कार्यक्रम मांय राज्यपाल हरिभाऊ बागडे, उपमुख्यमंत्री दीया कुमारी अर प्रेमचंद बैरवा, राज्य री पैली वाळी मुख्यमंत्री वसुंधरा राजे ई मौजूद रह्या। केन्द्रीय मंत्री गजेन्द्र सिंह शेखावत अर अश्विनी वैष्णव जोधपुर अर अर्जुनराम मेघवाल बीकानेर ऊँ वर्चुअल तरीका ऊँ कार्यक्रम ऊँ जुड़्या। कार्यक्रम रे दौरान प्रधानमंत्री पीएम कुसुम योजना रो फायदो लेवण वाळां सागे ई बातचीत कीनी। प्रधानमंत्री रो कार्यक्रम राज्य रा सगळा जिलां मांय ई बतायी ज्यो। जिलां मांय राखी ज्या रोजगार मेळां मांय नौकरी लागण रा कागजात हासिल करण वाळा नौजवान खुशी जताता थकां केन्द्र अर राज्य सरकार रो आभार जतायो।

प्रधानमंत्री नरेन्द्र मोदी आज बांसवाड़ा रा कार्यक्रम रे दौरान प्रदेश ने नुवी उदयपुरसिटी—चंडीगढ़ एक्सप्रेस, बीकानेर—दिल्ली कैंट वंदेभारत अर जोधपुर—दिल्ली कैंट वंदे भारत रेलगाड़ियां रो तोहफो दीनो। अ रेलगाड़ियां सारू व्हेवण रे मौके जोधपुर रेल्वे स्टेशन माथे राखी ज्या कार्यक्रम मांय रेल मंत्री अश्विनी वैष्णव कह्यो के जोधपुर ऊँ पुणे, चैन्नई अर हैदराबाद सारू रोजीना चालण वाळी रेलगाड़ियां चलायी ज्यी है। वे कह्यो के दिल्ली सारू वंदे भारत रेलगाड़ी सारू व्हेवण ऊँ लोग एक ही दिन मांय दिल्ली जा र पाछा आ सकेला।

जीएसटी कर प्रणाली रा बारा मांय जनता ने जाणकारी देवण सारू जैसलमेर जिला रा पोकरण मांय खास शिविर लगायी ज्यो। शिविर मांय विधानसभा मांय मुख्य सचेतक जोगेश्वर गर्ग अर पोकरण रा विधायक महंत प्रतापपुरी जनता सागे बातचीत कीनी अर सरकार कानी ऊँ जनता रा भला सारू चलायी जा रही योजनावां री जाणकारी दीनी। ई मौके जाणकार जीएसटी री आसानी अर साफगोई रा बारा मांय जाणकारी दीनी। उद्योग अर खेल राज्य मंत्री के.के. बिश्नोई ई पाली मांय जीएसटी मांय लारला दिनां करी ज्या

बदलावां रा फायदां री चर्चा कीनी। वे कह्यो के जीएसटी ने असरदार तरीका ऊँ लागू करणो भारत ने पाँच ट्रिलियन डॉलर री माली व्यवस्था बणावण ओड़ी सुनहरो कदम है।

राज्य ऊँ दिसावर मांय बिक्री मांय साल 2024–25 रे दौरान रिकॉर्ड बधोतरी व्ही है। उद्योग अर वाणिज्य मंत्री कर्नल राज्यवर्द्धन राठौड़ बतायो के साल 2023–24 मांय राज्य ऊँ दिसावर मांय 83 हजार 704 करोड़ रुपया री बिक्री व्ही ही, जो आवता साल बध र 97 हजार 171 करोड़ रुपया री व्हे गयी। श्री राठौड़ बतायो के ई तरह राज्य रा निर्यात मांय 16 फीसदी री बधोतरी व्ही है। वे बतायो के राज्य ऊँ गेहणा अर रत्न, इंजीनियरिंग सामान, कपड़ा, हाथ री कारीगरी ऊँ बण्या सामान, खेती–बाड़ी री उपज अर खाण–पीण रा सामान , प्लास्टिक अर चमड़ा रा सामान री दिसावर मांय बिक्री बधी।

नामचीन विचारक पंडित दीनदयाल उपाध्याय री जयंती रे मौके आज वां ने सिरधा भाव सागे याद कर्या जा रह्या है। उपराष्ट्रपति सी.पी. राधाकृष्णन अर प्रधानमंत्री नरेन्द्र मोदी पंडित दीनदयाल उपाध्याय ने सिरधा भाव सागे याद कीना। प्रधानमंत्री सोशल मीडिया पोस्ट मांय कह्यो के वे भारत माता रा महान सपूत अर एकात्म मानववाद री सुरुआत करण वाळा हा। ई मौके आखा राज्य मांय न्यारा–न्यारा कार्यक्रम राख्यी ज्या। जयपुर कने धानक्या मांय पंडित दीनदयाल राष्ट्रीय स्मारक स्थल माथे रोजगार सहायता शिविर लगायी ज्यो। जोधपुर रा पंडित दीनदयाल उपाध्याय पार्क मांय राख्यी ज्या कार्यक्रम मांय केन्द्रीय मंत्री गजेन्द्र सिंह शेखावत ई भेळा व्ह्या। वे जनता ऊँ पण्डित दीनदयाल उपाध्याय री जिन्दगी ऊँ सीख लेवण बाबत कह्यो। झुंझुनूं मांय राख्यी ज्या पुष्पांजलि कार्यक्रम मांय सामाजिक न्याय अर अधिकारिता मंत्री अविनाश गहलोत अर विधायक राजेन्द्र भांभू समेत जनता रा केई नुमाइन्दा शामिल व्ह्या।

प्रधानमंत्री नरेन्द्र मोदी री जिन्दगी माथे बणायी ज्यी फिल्म “चलो जीते हैं” जनता रो ध्यान खींचण सागे वां ने सीख ई दे रही है। जयपुर रा सचिन जैन फिल्म देख्यां पाछे बतायो के आ फिल्म दूजा सारु जीवण री सीख देवे है।

प्रदेश मांय “**एक दिन–एक घंटा–एक साथ**” थीम माथे आधारित ‘**स्वच्छता ही सेवा**’ वृहद् श्रमदान कार्यक्रम राख्यी ज्या। सिरोही जिला रा सिवेरा मांय केंद्रीय संचार ब्यूरो री ओर ऊँ रैली, संगोष्ठी, अर प्रदर्शनी रे मार्फत गांव वाळां ने जनता रा भला री केई योजनावां अर वां रा फायदां री जाणकारी दीरीजी। सवाईमाधोपुर जिला रा सूरवाल मांय केंद्रीय संचार ब्यूरो री ओर ऊँ स्वच्छता ही सेवा अर जीएसटी बचत उत्सव रा बारा मांय जागरुकता कार्यक्रम राख्यी ज्यो। राजधानी जयपुर रा रामनिवास बाग मांय जिला रा प्रभारी मंत्री जोगाराम पटेल समेत जनता रा केई नुमाइन्दा श्रमदान कीनो। ई मौके दस स्वच्छता प्रहरियां रो मान करी ज्यो। जैसलमेर मांय मुख्य सचेतक जोगेश्वर गर्ग गड़ीसर तळाव माथे अर रामदेवरा मांय श्रमदान कर र जनता ने साफ–सफाई रो महत्त्व बतायो। श्रीगंगानगर री ग्राम पंचायत नेतेवाला मांय जिला कलेक्टर डॉ. मंजू अर झुंझुनूं मांय जिला कलेक्टर डॉ. अरुण गर्ग री अगुवाई मांय अहलकार अर जनता

सफाई कीनी। खेतडी रा हिंदुस्तान कॉपर लिमिटेड मांय ई अहलकार अर कर्मचारी रैली निकाळ र काम री ठौड़ ने स्वच्छ बणावण रो संकल्प लीनो।

.....